



Sagutxo kaskarina

Oihane Perea Perez de Mendiola

Ipuin klasiko honen amaierak emango digu zer pentsatua eta zertaz hitz egina!
Zein da ipuinaren mezua?
Emango al diogu beste bukaera bat istorioari?

Doinua: Txuringaingo errota
Neurria: Zortziko txikia

NARRATZAILEA

- 1 Bazen behin sagutxo bat bakarrik **zegona** bikotea nahi zuen eder eta **ona** erratza pasatzean lurrean **txanpona** aurkitu zuen eta a ze **zoriona!**
- 2 Dendara joan zen gero lazoa **erostera** maitea topatzeko nolako **aukera** kartel bat jarri zuen ta **astebetera** animalia asko joan zen bere **etxera**.

Doinua: Gure eliz dorreko
Neurria: Kopla txikia

- 3 SAGUTXO KASKARINA
Kaixo txakur maitea zuk maite al **nauzu?**
Eta gaua heltzean zer egingo **duzu?**
- 4 TXAKURRA
Zaunka egingo dizut gaua **iristean** txakur bat behar duzu zure **aldamenean**.
- 5 SAGUTXO KASKARINA
Kaixo asto maitea zuk maite al **nauzu?**
Eta gaua heltzean zer egingo **duzu?**
- 6 ASTOA
Arrantza egingo dizut gaua **iristean** asto bat behar duzu zure **aldamenean**.

7 SAGUTXO KASKARINA

Kaixo kilker maitea
zuk maite al **nauzu?**
Eta gaua heltzean
zer egingo **duzu?**

8 KILKERRA

Nik abestuko dizut
gaua **iristean**
kilker bat behar duzu
zure **aldamenean.**

9 SAGUTXO KASKARINA

Kaixo katu maitea
zuk maite al **nauzu?**
Eta gaua heltzean
zer egingo **duzu?**

10 KATUA

Isilik egongo naiz
gaua **iristean**
katu bat behar duzu
zure **aldamenean.**

Doinua: Zelaia ikusi dut
Neurria: Zortziko txikia

NARRATZAILEA

11 Katua baino hoberik
ezin zen **espero**
ez zuen zaratarik
egingo **gauero!**
Ezkondu ziren biak
muxu eman **bero**
baina jan nahi zuela
ohartu zen **gero (bis).**

12 Sagutxoentzako da
mezu hau **izatez**
zuen burua maita
zazue **mesedez**
bikotea hautatu
buruz ta **bihotzez**
baina kontuz ibili...
katua inoiz **ez! (bis).**